

四庫全書

史部

欽定四庫全書

欽定續通志卷四百二十八

列傳

金

六

程霖

任熊祥

范拱

張通古

張浩

汝霖

張玄素

張汝弼

納哈塔椿年

祁宰

諾延溫都思忠

謙 烏達

高楨

白彥敬

張景仁

左光慶

程宋字公弼燕之析津人祖冀仕遼為廣德軍節度使
冀凡六男父子皆擢科第士族號其家為程一舉冀次
子四穆遼崇義節度使程宋四穆之季子也自幼如成
人及冠篤學中進士甲科累遷殿中丞天輔七年太祖
入燕授尚書都官員外郎改直史館修撰熙宗時歷翰
林待制兼右諫議大夫宋上疏言事其畧曰比見陛下
校獵凡羽衛從臣無貴賤皆得執弓矢馳逐而聖駕崎

嶮沙磧之地加之林木叢鬱易以迷失竊惟古天子出入警蹕清道而行以備非常陛下膺祖宗付託之重奈何獨與數騎出入林麓沙漠之中前無斥候後無羽衛恐貽宗廟社稷之憂又曰臣伏讀唐史追尊高祖以下謚號或加至十八字前宋大中祥符間亦加至十六字亡遼因之近陛下亦受崇天體道欽明文武聖德十字臣竊謂人臣以歸美報上為忠天子以追崇祖考為孝太祖武元皇帝受命開基八年之間奄有天下功德茂

盛振古無前止謚武元二字理或未安願詔有司定議
謚號又曰古者天子巡狩無非事者或省察風俗或審
理冤獄或問民疾苦以布宣德澤今鑒輅省方願憲古
行事又曰尚書省天子喉舌之官綱紀在焉臣願詔尚
書省戒勵百官各揚其職以立綱紀如吏部天官以進
賢退不肖為任使升黜有科任得其人則綱紀理而民
受其賜前代興替未始不由此者又曰臣伏見本朝富
有四海禮樂制度莫不一新宮禁之制尚未嚴密胥吏

健卒之輩皆得出入莫有呵止甚非嚴禁衛明法令之意疏奏帝嘉納之始命有司議上太祖尊謚皇統八年由翰林侍講學士為橫海軍節度使移彰德軍節度使卒

任熊祥字子仁八代祖圜後唐宰相圜孫睿隨石晉北遷遂為燕人熊祥登遼天慶八年進士第為樞密院令史太祖平燕以其地畀宋熊祥至汴授武當丞宋法新附官不釐務熊祥言於郡守楊哲請止給半俸養親哲

喜其薦金人取均房州熊祥歸朝仍為樞密院令史時高慶裔攝院事無敢忤者熊祥未嘗阿意事之後杜充劉筈同知燕京行省法制未一日有異論熊祥為折衷之天德初累官鎮西軍節度使被詔為會試主文以事不避難臣之職為賦題海陵大喜以為翰林侍讀學士未幾致仕大定初起為太子少師時契丹賊幹罕竊號北鄙用兵未息帝以為憂熊祥請以恩信招懷之帝問孰可使者對曰臣雖老憑國威靈尚堪一行帝曰卿老

矣無煩為此七年復致仕卒熊祥事母以孝聞母沒時年已七十不食三日人皆稱之

范拱字清叔濟南人九歲能屬文深於易學宋末登進士第尋事劉豫撰謁廟文豫奇之累擢中書舍人上初政錄十五篇納其說而不能行也豫以什一稅民名為古法其實裒斂刑法嚴急吏夤緣為暴右丞相張孝純及拱兄侍郎翼極言其弊請仍履畝法豫不從翼坐貶官自是無復敢言者拱曰吾言之則為黨兄不言則百

姓困弊乃上疏大畧以為國家懲宋重斂之弊什一稅民本務優恤官吏奉行太急驅民犯禁非長久計豫雖未即從而亦不加譴齊廢梁王宗弼領行臺省事訪求百姓利病拱以減稅為請宗弼從之減舊三分之一拱慎許可而樂推薦李南張輔劉長言皆拱薦也長言自汝州郟城酒監擢省郎人不知其所以進拱亦不自言皇統四年以疾求退致仕齊居讀書罕對妻子世宗在濟南聞其名大定初拱上封事七年召赴闕除太常卿

議郊祀或有言前代因所都定五岳今既都燕當別議
五岳名拱曰軒轅居上谷在恒山西舜居蒲坂在華山
北以此言之未嘗據所都而改岳祀也遂不改拱嘗言
禮官當守禮法官當守法若漢張釋之可謂能守法矣
九年復致仕卒於官

張通古字樂之易州易縣人讀書過目不忘該綜經史
善屬文遼天慶二年進士第補樞密院令史丁父憂起
復懇辭不獲因遜去屏居興平太祖割燕京與宋宋以

通古有素望召之通古辭謝隱居易州太寧山下宗望復燕京侍中劉彥宗與通古素善薦其才召為樞密院主奏改兵刑房承旨天會四年初建尚書省除工部侍郎兼六部事高慶裔設磨勘法仕宦者多奪官通古亦免去遼王宗幹為論理之除中京副留守

按照宗紀及交聘表天眷

元年八月以河南地與宋遼右司郎中張通古等使江南此處與紀表稍異為詔諭江南使

宋主欲南面使通古北面通古曰天子以河南陝西予宋宋約奉表稱臣使者不可以北面遂索馬欲北歸宋

主遽命設東西位使者東面宋主西面受詔拜起皆如儀使還聞宋已置戍河南謂送伴韓肖胄曰天子裂壤地益南國當思圖報大恩今輒置守戍自取嫌疑若興師問罪將何以為辭肖胄馳白宋主宋主遽命罷戍通古至上京具以白宗幹且曰及其部置未定當議收復宗幹喜曰是吾志也即除參知行臺尚書省事未幾詔宗弼復取河南通古請行先至汴諭之比至汴宋人已去或言宋人詐退將自許宿來襲我通古曰宣言來者

正所以走耳使人覘之宋人果潰去宗弼撫髀笑曰誰謂書生不能曉兵事哉海陵欲除胙王常勝會汴卒孫進詐稱皇弟謀作辭因指名胙王以誣構之遣護衛塏斯就汴京鞠治行臺欲導孫進引胙王通古極力辨止及塔斯奏狀海陵譖塔斯故出遂殺胙王并塔斯行臺諸人懼誅通古曰以正獲罪死賢於生海陵既殺胙王不復緣害他人由是行臺不坐天德初遷行臺左丞進拜平章政事封譚王改封鄆王以疾求解機務不許拜

司徒封瀋王海陵御下嚴厲收威柄親王大臣未嘗稍假以顏色惟見通古必以禮貌正隆元年以司徒致仕進封曹王是年薨通古天資樂易不為表暴雖居宰相自奉如寒素焉子沉天德三年賜楊建中榜及第

張浩字浩然遼陽渤海人本姓高東明王之後曾祖霸仕遼為張氏天輔中遼東平浩以策干太祖擢為承應御前文字天會八年賜進士及第授祕書郎太宗將幸東京浩提點繕修大內超遷衛尉卿權簽宣徽院事管

勾御前文字初定朝議求養親去職起為趙州刺史官制行以中大夫為大理卿天眷二年詳定內外儀式歷戶工禮三部侍郎遷禮部尚書田穀黨事起臺省一空以浩行六部事簿書叢委決遣無留人服其才以疾求外補除彰德軍節度使遷燕京路都轉使俄改平陽尹平陽多盜臨汾男子夜掠人婦浩捕得擄殺之盜遂衰息近郊有淫祠郡人爭事之浩撤其祠屋投其像水中強宗黠吏屏迹莫敢犯者郡中大治乃繕葺堯帝祠作

擊壤遺風亭海陵召為戶部尚書拜叅知政事天德二年丁母憂起復舊職進拜尚書右丞三年廣燕京城營建宮室浩與劉筈等監護工作貞元元年進拜平章政事賜宴魚藻池浩請四方之民欲居中都者給復十年以實京城從之拜尚書右丞相兼侍中封潞王未幾改封蜀王進拜左丞相正隆二年進封魯國公表乞致仕不許海陵欲伐宋將幸汴汴京大內失火使浩與敬嗣暉營建南京宮室浩從容奏曰往歲營治中都天下樂

然趨之今民力未復而重勞之恐不似前時之易成也不聽浩朝辭海陵問用兵利害浩欲止海陵用兵對曰趙構無子樹立疎屬其勢必生變可不煩用兵而服之海陵雖喜其言而不能從也浩至汴海陵時使宦者梁疏來視工役輒指某處不如法撤之浩不能抗汴宮成費累鉅萬海陵遷居之浩拜太傅尚書令進封秦國公時治兵南伐部署諸將浩欲奏事不得見乃因周福兒附奏曰諸將皆新進少年恐誤國事宜求舊人習兵者

為千戶穆昆而海陵部署已定惡聞其言杖之海陵發

汴京浩留治尚書省事世宗即位於遼陽浩遣戶部員

外郎完顏默音上賀表

按本紀世宗以正隆六年十月即位於遼陽時完顏默音為博

索路總管以兵五千自長安來附與默音傳相符不應有為浩奉表事當屬紀事之誤

明年二月

朝京師拜太師尚書令封南陽郡王世宗曰卿在正隆

時為首相不能匡救惡得無罪惟在省十餘年練達政

務故復相卿當自免毋負朕意浩頓首謝居數日世宗

諭浩舉人材可用者浩舉赫舍哩志寧等後皆為名臣

大定三年以疾請退除判東京留守疾不能赴任因致
仕是歲卒謚曰文康初近侍有欲罷科舉者帝曰吾見
太師議之浩入見帝問浩曰自古帝王有不用文學者
乎浩對曰有誰歟曰秦始皇帝顧左右曰豈可使我為

始皇事遂寢

按劉祁歸潛志言浩為尚書令時定制以進士為省史嘗言省庭為天下儀表如用

胥吏必致貨賂混淆用進士所以清其源也議者皆以
為當然趨走使令與掾吏不殊士大夫往往不就云

明昌五年配享世宗廟庭泰和元年圖像衍慶宮于汝
為汝霖汝能汝方汝猷

汝霖字仲澤少聰慧好學貞元元年

按翟永固傳張汝霖試進士在貞元

元年本傳訛作二年今改正

賜呂忠翰榜進士第授右補闕擢大興

縣令遷禮部員外郎翰林待制大定八年除刑部郎中
明年授太子左諭德兼禮部郎中尋擢刑部侍郎以憂
解起復為太子詹事遷太子少師兼御史中丞世宗召
謂曰卿嘗言監察御史所察州縣官多因沽買以得名
譽良吏奉法不為表襮必無所稱今為臺官可革其弊
尋改中都路都轉運使太子少師兼禮部尚書俄轉吏

部為御史大夫時將陵主簿高德溫多收稅戶米逮御史獄汝霖具二法上世宗責之曰朕以卿為公正故登用之德溫有人在宮掖朕頗詳其事朕肯以宮掖之私撓法耶不謂卿等顧徇如是汝霖跪謝復坐失出大興推官高公美罪謫授隸州防禦使頃之復為太子少師兼禮部尚書拜叅知政事後因朝奏曰論事帝前世宗謂曰朕觀唐史見太宗行事初甚勵精晚年與羣臣議多飾辭且有過舉朕雖不能比迹聖帝明王然常思始

終如一今雖年高敬慎之心無時或怠汝霖對曰古人
有言靡不有初鮮克有終魏徵所言守成難者正謂此
也帝以為然二十五年章宗以原王判大興府事帝命
汝霖但涓視事日且加輔導久之遷尚書右丞二十八
年進拜平章政事兼修國史封芮國公世宗不豫與太
尉圖克坦克寧右丞相襄同受顧命章宗即位加銀青
榮祿大夫進封莘時帝在諒陰初出獵諫院聯章言新
喪中未宜其後冬獵汝霖諫之詔答曰卿能每事如此

朕復何憂然時異事殊難同古昔如能斟酌得中斯為當矣時有司言民間收藏制文恐因而滋訟乞禁之汝霖謂王者之法譬之江河欲使易避而難犯本朝法制坦然明白已著為不刊之典天下之人無不聞誦若令私家藏之則人皆曉然不敢為非亦助治之一端也不禁為便詔從之明昌元年三月表乞致仕不許十二月卒謚文襄汝霖通敏習事凡進言必微揣帝意及朋附多人為說故言嘗不忤章宗新即位改造殿庭諸陳設

物日用繡工一千二百人帝以多費意輟造汝霖曰此非帝服用未為過侈將來外國朝會殿宇壯觀亦國體也其後奢用浸廣蓋自汝霖導之

張玄素字子貞與浩同曾祖祖祐父匡仕遼至節度使玄素以蔭得官高永昌據遼陽玄素在其中幹魯軍至乃開門出降特授世襲銅州明安天會間歷西上閤門使客省使東宮計司天眷元年以靜江軍節度使知涿州察廉最進官一階皇子魏王道濟遙領中京以玄素

為魏王府同提點尋改節度使正隆末年天下盜起玄素發民夫增築城郭未幾隣郡皆被寇掠興平獨安世宗即位玄素來見於東京初玄素在東京希海陵旨言世宗嘗取在官黃糧及撫其數事至是來見世宗一切不問玄素與李石力言宜早幸燕京帝深然之遷戶部尚書出鎮定武遂致仕卒玄素厚而剛毅人皆懼之汝弼字仲佐父玄徵彰信軍節度使玄素之兄也汝弼初以父蔭補軍正隆二年中進士第調潘州樂郊縣主

簿母高氏與世宗母貞懿皇后有屬世宗納汝弼女弟
為次室是為元妃生趙王永中世宗即位於遼陽汝弼
與叔玄素俱往歸之擢應奉翰林文字自皇統以來內
藏諸物費用無度吏賁緣為奸多亡失汝弼與宮籍直
長高公穆入殿實達爾王添兒閱實以類為籍作四庫
貯之於是內藏庫使王可道等皆杖一百汝弼等各進
階頃之兼修起居注轉右司員外郎母憂去官起復吏
部郎中累遷吏部尚書拜參知政事帝因出獵女真明

安穆昆徙中都者前訴以所給近郊官地皆墾簿不可種藝其腴田皆豪民久佃專為己有詔拘官田在民久佃者與之因命汝弼議其事汝弼請條約立限令百姓自陳過限許人首告實者與賞帝可其奏仍遣同知轉運使張九思拘籍之帝問高麗夏皆稱臣使者至高麗與王抗禮夏王立受使者拜何也汝弼等對曰故遼與夏為甥舅夏王以公主故受使者拜本朝與夏約和誓書稱一遵遼國舊儀今行之已四十年不可改也帝曰

卿等言是也拜尚書右丞進左丞與族弟參知政事汝霖同日拜時以為榮久之坐擅增諸皇孫食料與汝霖及丞相守道右丞鈕祐祿額特埒各削官一階汝弼在病告帝謂宰相曰汝弼久居執政練習制度頗能斟酌人材而用心不正乃罷為廣寧尹汝弼為相不能正諫帝所欲為則順而導之所不欲為則微言以觀其意帝責之則婉辭引過且黷貨以計取諸家名園甲第珍玩奇好士論薄之大定二十七年卒汝弼既與永中甥舅

陰相為黨章宗即位汝弼妻高氏每以邪言怵永中覲
非望有司鞫治高氏誅伏事連汝弼帝以事覺在汝弼
死後得免削奪

納哈塔椿年本名烏頁初置女真字立學官於西京椿
年與諸部兒童俱入學最號警悟久之選諸學生送京
師俾上京教授頁嚕教之椿年在選中補尚書省令史
累官殿中侍御史改監察御史海陵為相薦為右司員
外郎編定新制海陵篡立以為諫議大夫椿年有酒失

海陵使之戒飲遂終身不復飲改秘書監修起居注授
世襲明安為翰林學士兼御史中丞正隆初起上京諸
明安於中都山東等路安置以勞賜玉帶殿馬奉遷山
陵還為都檢點賜今名拜參知政事薦大理寺丞赫舍
哩羅索為右司員外郎羅索後賜名良弼世宗時號賢
相焉二年椿年薨海陵親臨哭之追封特進譚國公謚
忠辯以長子薩木哈為定遠大將軍襲明安次子哈達
為忠武校尉椿年有宰相才好推輓士類然頗營產業

冒占西京路官田八百餘頃大定中括檢田土百姓陳
言椿年子薩木哈等三十餘家占據官地貧民不得耕
種詔諸家除牛頭稅地各再給十頃其餘盡賦貧民種
佃世頗以此譏椿年云

祁宰字彥輔江淮人宋季以醫術得官王師破汴得之
後隸太醫累遷中奉大夫太醫使海陵將伐宋宰欲諫
不得見會元妃有疾召宰診視既見即上疏畧言國朝
之初祖宗以有道伐無道曾不十年蕩遼戡宋當此之

時上有武元文烈英武之君下有宗翰宗雄謀勇之臣然猶不能混一區宇舉江淮巴蜀之地以遺宋人況今謀臣猛將異於曩時加以大起徭役繕治甲兵調發軍旅賦役煩重民人怨嗟此人事之不修也間者晝星見於牛斗熒惑伏於翼軫已歲自刑害氣在揚州太白未出進兵者敗此天時不順也舟師水涸舳艫不繼而江湖島渚之間騎士馳射不可驅逐此地利不便也言甚激切海陵怒命戮於市籍其家產天下哀之綦戢宰

壻也海陵疑奏疏戢為之辭曰實不知也乃杖之大定四年贈資政大夫復其田宅章宗即位詔訪其子忠勇校尉平定州酒監公史擢尚藥局都監泰和初詔定功臣謚尚書省掾李秉鈞上言故贈資政大夫祁宰以忠言被誅慕義之士盡傷厥心世宗即位贈之以官陛下錄用其子甚大惠也而有司拘文以職非三品不在議謚之例臣以為非常之人當以非常之禮待之乞即詔有司特賜謚以旌其忠制曰可下太常謚曰忠毅

諾延溫都思忠本名伊里布阿薩水人太祖伐遼時未
有文字凡軍事當密覆者諸將皆口授思忠思忠面奏
受詔還軍傳致詔辭往復數千言無少誤及遼人議和
思忠與烏凌阿贊謨為扎拉往來專對其間自收國元
年正月遼人遣僧嘉努來議和前後十三遣使和議終
不可成其後思忠從宗翰伐宋封劉豫為齊帝以為傳
宣使俄授穆昆從宗弼克和尚原還為西京留守事天
眷初改蒲州防禦使陝西帥府官屬往往豪壓貧民為

奴遣工匠千人東至河上思忠留止其人以聞詔皆還之為行臺尚書左丞贖貨無厭時贊謨為行臺參知政事心甚鄙之兩人由是交惡海陵殺左丞相秉德於行臺贊謨妻秉德乳母也思忠因構贊謨殺之是歲思忠入為尚書右丞進平章政事封邵國公拜左丞相兼侍中改封沂國公天德三年致仕貞元二年起拜太傅領三省事封齊國公尋拜太師兼勸農使復為尚書令海陵欲定封爵制度令思忠建白封王者皆降封公惟封思

忠廣平郡王賜以玉帶思忠言百官不當封妻海陵從之惟封思忠次室為郡夫人思忠亦自謂太祖舊臣頗自任雖海陵遂非拒諫而思忠盡言無所避海陵將伐宋問諸大臣皆不敢對思忠曰不可海陵不悅謂思忠曰汝勿論可否但云何時克之思忠曰十年海陵曰何久也思忠曰太祖伐遼猶且數年今百姓愁怨師出無名江淮間暑濕湫熱不堪久居未能以歲月期也海陵怒顧視左右若欲取兵刃者思忠無所畏恐復曰老臣

歷事四朝位至公相苟有補於國家死亦何憾有頃海陵曰自古帝王混一天下然後可為正統爾耄夫固不知此其後海陵運四方甲仗於中都思忠曰州郡無兵何以備盜賊又盡籍丁壯為兵思忠曰山後契丹諸部恐未可盡起皆不聽後州郡盜起守令不能制契丹薩巴斡罕果反正隆六年思忠薨海陵深悼惜之大定十二年詔復烏凌阿贊謨官爵贈特進初思忠已構殺贊謨遂納其妻曹氏盡取其家財產章宗即位贊謨女五

十九乞改葬詔賜葬地於懷州并以思忠原取家資付
之子謙

謙本名伊德累官御史中丞世宗謂之曰省部官受請
託有以室家傳達者官刑不肅士風頹敝如此其糾正
之初世宗至中都放宮人還家有稱心等數人在放遣
之例所司失於檢點不得出宮心常怏怏大定二年閏
二月癸巳夜按世宗紀太和厚德殿火在閏二月辛卯與此互異遂於十六位放
火延燒太和神龍殿帝命近臣迹火之所發誅稱心等

謙意宮殿被火將興工役上表乞權紓修建帝詔謙曰
朕思正隆比年徭役百姓瘡痍未復邊事未息豈遽有
營繕耶久之襲父思忠濟州明安利涉軍節度副使烏
凌阿楚呼追捕逃軍至明安中謙畏其擾乃醵民財賂
楚呼事覺楚呼抵罪謙坐奪明安遇赦使復其所

烏達思忠姪也天會間充女真字學生通書史工為詩
選為尚書省令史累官同知大興尹京城盜賊止息事
無留滯歷刑兵吏三部尚書正隆伐宋為武定軍都總

管世宗即位遣使召之授咸平尹為北邊行軍都統改
會寧尹時初定幹罕人心未安烏達為治寬簡多備禦
謹斥候邊郡以寧改北京留守以廉察舉烏達所在有
能名無私過由是入拜參知政事世宗諭之曰凡在卿
上者行事或不當理咨稟不從卿以所見奏聞下位有
可用之才當推薦之俄以疾卒久之帝謂侍臣曰朕樂
得忠直之人有如烏帶者乎卿等為朕舉之其見思如
此

高楨渤海人遼太師牟翰五世孫少好學嘗業進士幹
魯討高永昌已下瀋州永昌懼偽送款以緩師是時楨
母在瀋州遂來降告以永昌降款非誠幹魯乃進攻既
破永昌以楨同知東京留守事授明安天會六年遷尚
書左僕射判廣寧尹加太子太傅在鎮八年政令清肅
吏畏而人安之十五年加太子太師提點河北西路錢
帛事天眷初同簽會寧牧熙宗幸燕改同知燕京留守
封戴國公魏王道濟出守中京以楨為同判俄改行臺

平章政事為西京留守封任國公時奚霫軍民皆南徙
穆昆布木因之嘯聚為盜海陵患之以楨為中京留守
賊平封河內郡王海陵至中京楨警夜嚴肅有近侍馮
僧嘉努李街喜等皆得幸海陵嘗夜飲于禁楨杖之瀕
死由是權貴震懾遷太子太保行御史大夫封莒王策
拜司空進封代王楨久在臺彈劾無所避每進對必以
區別流品進善退惡為言當路忌之薦張忠輔馬諷為
中丞欲令以事中楨正隆例封冀國公楨因固辭曰臣

為衆小所嫉恐不能免尚可受封爵耶海陵知其忠直
慰而遣之及疾草書空獨語曰某事未決某事未奏死
有餘恨卒海陵悼惜之損性方嚴家居無聲伎之奉雖
甚暑未嘗解衣緩帶對妻孥危坐終日不一談笑其簡
默如此

白彥敬本名約索博勒和部族人初名彥恭避睿宗諱
改焉祖額布根父阿蘇仕遼為率府率彥敬善騎射起
家為吏補元帥府令史除都元帥府知事招諭諸部授

以金牌行數千里有功超遷兵部郎中熙宗罷統軍司改招討司遣彥敬分僚屬收牌印諭諸部隸招討司還為本部侍郎改刑部侍郎怨家誣開府慎思與西北路部族謀叛彥敬鞫得其實海陵嘉之遷簽書樞密院事正隆六年調諸路兵伐宋及調民馬使彥敬主會寧扶餘呼爾哈三路事改吏部尚書充南征萬戶遷樞密副使契丹薩巴反樞密使布薩呼圖克等以無功坐誅以彥敬為北面行營都統許以便宜行至北京聞南征諸

軍逃歸者皆奔東京欲推戴世宗彥敬與副統赫舍哩志寧謀陰結會寧尹完顏富色里利涉軍節度使通吉義以圖之世宗已即位使舒穆魯伊德伊喇赫伯等九人招彥敬志寧彥敬拒之殺伊德等及完顏默音將兵攻北京彥敬使偏將拒於建州通吉義先歸世宗富色里稱疾不至世宗密遣人揭榜於北京市購以官賞彥敬志寧恐人圖己遂降以為哈斯罕節度使不數月召為御史大夫幹罕平召彥敬為兵部尚書出為鳳翔尹

累改河中尹大定九年卒於官

張景仁字壽甫遼西人累官翰林待制貞元元年

原文作二

年今依翟永固傳改

與翟永固俱試禮部進士以尊祖崇天為賦

題忤海陵旨杖之大定二年布薩忠義伐宋景仁掌其
文辭宋人議和已改奉表為國書稱臣為姪但不肯世
稱姪國往復七書然後定其書皆景仁為之指事達意
世宗稱其能五年罷兵入為翰林直學士七年遷侍講
八年為侍讀官遷翰林學士兼同修國史十年兼太常

卿學士轉承旨兼修國史改河南尹二十一年召為御史大夫仍兼承旨修國史世宗謂景仁曰卿博學老儒求如古之御史大夫斯為稱矣卿醉中頗輕脫失言當以酒為戒初朝臣言景仁有文藝而頗率易不可任臺察景仁被詔就臺中治監察罪輒以便服視決罰帝聞之召責景仁未幾劾奏平章政事烏庫哩元忠輒斷六品官無人臣禮帝是其奏傳詔戒敕元忠元忠尚豫國公主怙寵自任倨慢朝士景仁劾之朝廷肅然是歲卒

左光慶字君錫薊州人宰相企弓之孫也幼穎悟沉厚
少言以蔭補閤門祗候遷西上閤門副使丁父憂起復
東上閤門副使再轉西上東上閤門使兼太廟署令光
慶好古讀書識大義喜為詩善篆隸尤工大字世宗行
郊禮受尊號及受命寶皆光慶篆凡宮廟榜署經光慶
書者人稱其有法典領原廟坤厚陵壽安宮工役不為
苛峻使勞逸相均身兼數職勤慎周密未嘗自伐世宗
獨察之遷同知宣徽院事改少府監丁母憂起復右宣

徽使世宗幸上京光慶治儀仗制度人以為得宜大定
二十五年卒平時喜為善言蓄善藥號善善道人晚信
浮屠法自作真贊語皆任達云

欽定續通志卷四百二十八

欽定四庫全書

欽定續通志卷四百二十九

列傳

金七

溫特赫富拉塔 伯特德哩布 蕭旺嘉努

田顯 趙賊 耶律圖善

烏雅呼爾哈 烏雅沃里布 蕭恭

耶律恕 郭企忠 烏蘇額琳

延札們都

布薩歡塔

鄭建充

烏庫哩薩哈

高松

通吉義

烏雅富埒赫

烏雅普霞努
札拉

李師雄

尼瑪哈楚呼

瓜爾佳札拉

圖克坦喀齊喀

溫特赫富拉塔隆州伊蘭明安噶勒珠寨人魁梧美髯
有謀畧以智勇聞都統果取中京富拉塔權明安領軍
五千遇契丹萬餘與戰敗之出恭古魯道敗敵八千至

拉們華道設伏敗敵萬人有頃賊三千餘復寇拉們華道富拉塔整隊先登賊識其旗幟望風而遁遂奮擊之親執賊帥皇統元年從梁王宗弼伐宋留軍唐州敵衆奄至富拉塔擊之大名軍萬四千富拉塔率親管明安衝擊敵少却乃張左右翼併擊敵衆散走復以兵三千擊走援兵二萬時邳州土賊嘯聚幾二十萬富拉塔軍三千分數隊急攻賊潰去南京路破敵軍二萬是日有兵自城中出者擊敗之二年遷定遠太將軍同知鳳翔

尹六年改京兆尹轉寧州刺史改西北路招討都監遷
永定軍節度使海陵南征改武衛軍都總管大定三年
授開遠軍節度使改泰寧軍卒十九年以功官其子

伯特德哩布奚五王族人遼御院通進天會初與父托

卜嘉歸朝授世襲穆昆後以京兆尹致仕德哩布招降

松山及平州薊州

按金史地理志無蘇州惟薊州與平
州俱隸中都路此處蘇州當是薊州

之訛
謹改

未附軍民督之耕作宗望伐宗德哩布為軍馬明

安留與諸將規取保遂安三州攻安肅軍與河間雄保

援兵先戰大軍繼至大破其兵遂拔安肅德哩布攝通
判事降將胡愈結衆謀亂德哩布勒兵擒愈及其衆五
十餘人改安肅為州就除同知州事改磁州捕獲太行
羣盜元帥府以磁相二州屯兵屬之擒王會孫小十苗
清等羣盜平遷濱州刺史廉入優等丁母憂起復本州
改刺涿州入為工部郎中從張浩營繕東京宮室及田
穀黨事起朝省一空德哩布攝行六部事遷大理卿出
為同知東京留守天德間丁父憂起復沼州防禦使正

隆盜起州縣無兵不能禦洎舊有河附城下乃引水注
壕中盜弗能近州賴以安遷崇義軍節度使未幾告老
歸田里卒德哩布為人孝謹為政簡靜不事蓄積凡調
官行李止車一乘婢僕數人而已

蕭旺嘉努奚人居奎騰河魁偉多力未冠仕遼為太子
率府率天輔七年都統杲定奚地旺嘉努率其鄉人來
降命為千戶領之奚王和勒博既死其親黨徹辰阿固
齊猶保色克山旺嘉努與托紐往討生擒之降其餘衆

時平灤多盜旺嘉努以所部屢破賊兵數被賞賚從宗望伐宋敗郭藥師於白河至河上宗兵扼津要與諸將

擊敗之進圍汴破其東門明年再伐宋宗望軍至中山

諸門分兵出戰焚我攻具祁州

按金史地理志祁州河間皆與中山相近宋史

亦同此處誤作祁謹據改

河間各以兵來援皆敗之師還屯鎮河朔

從臨淄貝勒卓琳討濱州賊葛進領穆昆先登力戰破其衆數萬明年攻滄州宋兵拒戰復從卓琳擊走之宗將徐文以舟百艘泊海島即以商船十八進襲斬首七

百級獲舟二十天會八年除靜江軍節度使授世襲千戶從梁王宗弼征代為萬戶還為五院部族節度使天德二年改烏爾古德呼勒招討都監卒

田顥按太祖本紀天輔七年二月遼來州節度使田顥等降考遼史作田顥本紀既誤顥作顯而傳中又誤顥為顯殊未盡一應從遼史為是謹據改字默之興中人遼天興八年進

士歷官金部員外郎權歸德節度使太祖定燕顥舉四州版圖歸朝加都官郎中權節度使事四遷知真定府事招降齊博游貴等賊衆五千餘人已而貴復叛去顥

遣齊博偽叛從貴伺間殺之降其衆賊壘悉平三遷行
臺左丞彰德軍節度使是時新定力役黥蠲籍之半而
上之故相之繇賦比他州獨輕徙同知河北東路都總
管改同簽燕京留守司事民遮留不得出易服夜去改
河東南路轉運使尋改絳陽軍節度使居三年以疾請
謝事不允移鎮震武軍

按金史地理志有震武軍隸河
東北路無振武軍名此處訛作

振謹
據改

入為刑部尚書居三月請老卒于家

趙臧字德固遼陽人其婦翁以優伶得幸於遼主臧補

閣門祇候累遷太子左衛率後居灤州宗望討張覺賊
踰城出降授洛苑副使累遷棣州刺史侍衛步軍都虞
候再伐宋攻真定與有功改刺商州歷沿邊安撫使隴

州團練使

按王圻續文獻通考云遼南面官有漢軍都
團練使金不置攷金地理志有隴州防禦使

而無團練使之官然則本
傳所云蓋防禦使之誤也

十年改知石州賊久在兵間

不善治民坐謗議謫監平州甜水鹽齊國廢河南皆以
宿將守之授賊宿州防禦使統本路軍兵賊重義接儒
士嘗以事至汴有故人子負官錢百萬賊以橐金贈之

其子悉為私費復代輸之頃之有頌徐帥不法者詔臧鞠治臧委曲營護坐是廢罷寓居於燕海陵出領行臺

省至燕臧往見因訴其事及海陵即位起為保大軍節

度使貞元初改內省使

按王圜續文獻通考云遼南面內省官曰內省使金則分領于

宣徽使而不設內侍省則內省使亦遼官名也宣臧為遼人故傳亦多仍遼舊缺未幾為中都路

都轉運使明年再徙順義興平入為太子詹事鎮沁南

以疾卒後十餘年臧子孫及司徒張通古子孫皆不肖

淫蕩破貲財世宗聞之詔自今官民祖父亡沒子孫不

得分割居第止以嫡幼主之母致鬻賣仍著于令

耶律圖善系出約尼氏在遼世為顯族圖善仕至金吾
衛大將軍遼帝奔天德圖善以所部降宗翰承制授西
北路招討使從伐朮率本部為先鋒至汾州遇朮將折
家軍請濟師併力破之攻太原隆德府克洛陽及羅索
平陝右圖善皆從天會七年授太子少保十年遷尚書
左僕射致仕卒正隆例贈特進邵國公

烏雅呼爾哈海蘭路錫馨水人後授愛呼穆昆因家焉

從棟摩圍平州有功及伐宋圍汴與五穆昆遇宋兵萬人于城南馳擊敗之天會五年攻宗城縣敵棄城走恩州呼爾哈追殺千餘人獲車四百輛七年討平泰山羣盜毀其營柵復破兗州山寇三千餘八年攻廬州至柘舉鎮呼爾哈領甲士三十為前鋒執宋所遣持書與劉錡者七人復以先鋒軍攻和州設伏獲姚觀察九年按宋建炎三年金天會七年也宋高宗紀建炎三年八月金人犯廬州又陷和州金太宗紀天會八年十一月宗輔以陝西事狀聞詔獎諭之以定陝右呼爾哈以所部遇事攻之八年九年字俱誤

敵千人敗之生擒甲士一人盡得敵之虛實又從富埒
瑛徇地熙秦敗敵兵二千於秦州前後皆被賞宋人屯
襄陽府監軍阿巴遣呼爾哈領四明安往攻宋兵三千
方營壁壘乘其未就突戰破之梁王宗弼復河南將攻
陳州遣呼爾哈以甲士三十捕偵候人至蔡州西敗敵
兵八十餘獲南頓縣令及攻陳州夜半敵潰走呼爾哈
亟追襲明安托克索亦領軍繼至大敗之皇統二年遷
定遠大將軍歷同知京兆尹兼本路兵馬都總管大定

間累授歸順軍節度使十年移鎮顯德卒於官十九年
詔授其子五十六武功將軍世襲本路博多和河穆昆
烏雅沃里布海蘭路禪嶺人徙大名路天會中從其父
達希布隸元帥右監軍麾下達蘭以事赴闕以達希布
自隨沃里布願其父穆昆從大軍攻滄州方夷壕隍城
中兵來拒沃里布擊却之王師下青州力戰有功獲馬
百匹降賊黨甚衆青州戍將德克濟布以萊州兵衆請
濟師于帥府沃里布將十二穆昆兵往救降四營拔一

營得戶四千又敗賊兵五萬于恩州降戶五萬獲牛畜
萬餘將至臨清敗敵兵三千擒賊首以獻時德克濟布
敗于恩州沃里布復以兵四千往救破敵萬餘衆兵十
萬在單父間沃里布領其親管穆昆從伊楞古往攻之
力戰有功大軍經畧密州沃里布將兵二千為前鋒敗
敵萬人于高密追至城下殺戮殆盡獲馬牛三千餘又與
伯騰敗賊王義軍十餘萬于州南是夜賊兵數千襲營
復以兵擊走之天眷二年襲其父世襲明安授寧遠大

將軍皇統七年益以親管穆昆天德三年除同知歸德
尹正隆初為唐古部族節度使大定二年為保大軍節
度使改鎮通遠時宋軍十萬餘入河隴元帥左都監喀
齊喀奏請益兵詔益兵七千遣沃里布與彰化軍節度
使宗室彰等七人偕往以備任使進階龍虎衛上將軍
卒于軍中

蕭恭字敬之納琳奚王之後父翊天輔間歸朝從攻興
中遂以為興中尹師還以恭為質子宗望伐宋翊領建

興成川懿五州兵為萬戶軍帥以恭材勇使代其父行
時年二十三至中山先以所部擊敗宋兵經山東及渡
淮襲宋主皆在軍中師還帥府承制授德州防禦使奚
人之屯濱棣間者皆隸焉改棣州防禦使皇統間累遷
兵部侍郎授世襲穆昆坐問禁中起居狀決杖奪一官
貞元中歷兵部尚書經畫夏國邊界還過臨潼失所佩
金牌至太原憂恚成疾而卒海陵深悼惜之命其子玖
格護喪以還賻贈甚厚

耶律恕字忠厚本名耨埒遼橫帳秦王之族也為人謹
愿有志喜讀書通契丹大小字與耶律果巴來歸羅索
問果巴曰與爾同來者誰可任軍旅事果巴對曰耨埒
可羅索與宗翰伐宋恕隸前鋒取和尚原攻仙人關為
睿宗所知再除太原真定少尹薩里罕辟署陝西叅謀
委以軍務遷行臺兵部侍郎再遷尚書左司郎中海陵
為平章政事謂恕曰君亦有黨乎恕正色曰不以其道
得之非恕之志也何朋黨之有久之為沁南軍節度使

遷行臺工部尚書行臺罷改安國軍節度使為叅知政
事以疾求解為興中尹入為太子少保正隆元年致仕
封廣平郡王卒二年例贈銀青光祿大夫

郭企忠字元弼唐汾陽王子儀之後自子儀至承勲皆
節鎮北方唐季承勲入遼子孫繼為天德軍節度使至
昌金降為副使企忠幼孤事母孝謹年十三居母喪哀
毀如成人服除襲父官加左散騎常侍天輔中大軍至
雲中遣耶律坦招撫諸部企忠來降軍帥命同勾當天德

軍節度使事徙所部居韓州及見太祖聞知其家世禮
遇優厚天會三年領西南諸部蕃漢軍兵為明安從破
雁門屯兵遙領桂州觀察留後鎮代州明年賊楊麻胡
等聚眾數千于五臺企忠與同知州事迪里討平之遷
知汾州事時汾州初下居民多被掠城邑蕭然企忠言
之帥府聽其親舊贖還未幾完實如故石州賊閻先生
眾數萬至城下僚屬慮有內變請為備企忠曰吾于汾
人有德保無他乃率吏民城守會援至合擊破之六年

改靜江軍節度留後遷天德軍節度使汴京步軍都指揮使累遷金吾衛上將軍秩滿權沁州刺史到官歲餘卒

烏蘇額琳善騎射襲父薩哈穆昆從蒙克攻東京及廣寧擊北京山賊皆有功蕭布展來攻恩州額琳以六十騎偵之逮夜遇敵數百騎掩擊之生獲三人知布展衆九萬且至故蒙克得以爲備遂破布展從宗望伐宋破尉氏中年援兵取其城又以兵百五十人破敵於滄州

西明年再伐宗蒙克戍開州額琳以騎四百守河復敗
千餘人斬首七百餘宗弼渡淮聞王善兵扼其前使額
琳濟師敗王善于和州北李成以兵七萬據烏江額琳
復敗之宗弼遂渡江至江寧天會十五年沂州竇防禦
叛額琳敗而獲之錄前後功授明安加昭武大將軍宗
弼再取河南額琳以五十騎敗楊家賊五百于徐州東
復以功受賞天德二年除唐州刺史移淄州遷實壘部
族節度使行至北京病卒

延扎們都隆州巴爾嘉山人身長美鬚髯夫會間從其兄揚阿在軍中方取汴京其兄戰歿遂擐甲代之睿宗定陝西以們都為佛寧隸監軍果親管萬戶改饒風關至坊州果欲與總管富勒呼會於鳳翔遣們都領六十騎先往期會及還備得地形險阨天眷初叛將李世輔偽邀果至私署以獻甲為名遂以兵劫執而去們都突出以告押軍明安完顏達蘭同率兵追及果由此得脫以功遷明威將軍復從果招復陝西劉豫初廢諸路多

反覆不一杲授們都牌劄令往撫定們都所至多張甲
兵從者安之違者討之帖然無復叛者皇統間歷知保
安軍事正隆初為寧州刺史大定初宗將吳璘等以軍
數十萬人據秦隴元帥府承制以們都為勇烈軍都總
管領軍討之宗人保據德順都監喀齊喀領軍四萬來
赴遂復德順州明年秦隴平以功遷金吾衛上將軍授
通遠軍節度使五年改慶陽尹兼本路兵馬都總管卒
于官十九年錄功以子祿格世襲本路海蘭烏珠明安

都倫赫紳穆昆授武功將軍們都性忠謹安置營壁尤能慎密臨敵泰然自若如平時由是人益安附功易成焉

布薩歡塔扶餘路嘉們人身長七尺勇健善騎射年十六從其父和木索征伐初授脩武校尉為宗弼章京天眷二年與宋岳飛相拒歡塔領六十騎深入峴伺至鄔陵敗宋護糧餉軍七百餘人多所俘獲皇統九年除慈州刺史再遷利涉軍節度使授世襲濟州和卓海蘭明

安舍哩斡實穆昆貞元初以憂去官起復舊職歷泰寧
永定軍改咸平尹海陵殺歡塔弟樞密使呼圖克召歡
塔至南京以有功舊釋之改興平軍節度使世宗即位
以為廣寧尹斡罕反為行軍都統與海蘭路總管圖克
坦克寧俱在左翼敗斡罕於長樂改臨潢尹賊平賜金
帛改海蘭路兵馬都總管徙顯德軍慶陽尹致仕大定
十二年帝思舊功復起為利涉軍節度使尋以金紫光
祿大夫致仕卒歡塔歷一十七官未嘗為佐貳性沉厚

有識明于聽斷所至有聲

鄭建充字仲實其先京兆人占籍鄜州仕宋累官知延安府事天會七年來降仍知延安屯兵三千宋劉光烈兵八萬來攻相拒四十餘日攻益急建充遣人會綏赫軍夾擊破之俘其裨將賀貴遷節制司統制軍馬改京兆府路兵馬都監敗宋曲端於彭原高昌宗據延安為宋守建充擊之盡復城邑復知延安軍府事累遷博州團練使知寧州齊國廢朝廷以地與宋建充為宋環慶路

經畧安撫副使仍知寧州天眷初復取陝西仍以建充
為經畧安撫使知慶州從破甘谷城改平涼尹時營建
南京宮室大發河東陝西材木浮河而下經砥柱之險
筏工多沉溺有司不敢以聞乃誣以逃亡錮其家建充
曰其事請至砥柱解筏順流散下令善游者下流接出
之錮者得釋正隆軍興括筋角造軍器百姓往往椎牛
取之或生拔其角建充曰其事於朝建充性剛暴常畜
獬犬十數奴僕有罪既笞復噬犬啣之骨肉都盡雖謙

遜下士於敵已上一無所屈省部文移有不應法輒即
毀裂在位者銜之軍胥李換竊用公帑自度不得免乃
誣建充藏甲欲反再鞠皆無狀奏上攝事者素與建充
有隙恐其得釋使吏持文書紿建充曰朝省有命奈何
建充曰惟汝所為是夜死於獄中長子懋亦死焉

烏庫哩薩哈海蘭路愛呼河人後徙真定睿宗聞其勇
畧選充章京後從宗弼征伐補麴院都監從伐宋與宋
兵遇於潁州先登破之皇統元年領漢軍千戶帥府再

以軍四千隸焉除同知鄭州防禦使事大定初遷太子少詹事帝以薩哈昔事睿宗積勞苦又輔佐太子宣力為多因改洺州防禦使以酬其勞遷永定軍節度使歷臨潢鳳翔陝西路統軍使東平尹節制州郡躬行儉約政先寬簡邊庭久寧人民獲安召為簽書樞密院事卒十八年世宗追錄薩哈舊勞授其子大興河北西路受呼河世襲明安阿里瑪河穆昆階武功將軍

高松本名博多澄州析木人年十九從軍為佛寧有力

善戰宗弼聞其名召置左右從破汴京及和尚原累官
咸平總管府判官世宗即位充管押東京路渤海萬戶
兵部尚書克實謀反前同知延安尹李老僧曰我與萬
戶高松謀之必從我矣衆曰若得此軍舉事易矣老僧
往見松說松曰君有功舊人至今不得大官何也松曰
我一縣令也每念聖恩累世不能報尚敢有望乎老僧
遂不敢言松從征韓罕以功遷咸平少尹四遷至宗義
軍節度使卒

通吉義本名呼拉布哈斯罕人徙居遼陽之阿穆濟山
祖輝罕父密拉收國二年哈斯罕來附密拉領戶三百
遂為穆昆義以質子至上京善女真契丹字為管勾御
前文字天會十五年擢右監門衛大將軍除寧化州刺
史察廉遷德呼勒部族節度使歷河南路統軍都監武
勝軍節度使邊郡妄稱寇至統軍司徒居民於汴義不
聽曰梁王南伐彼死亡未復豈敢先發此城中有權場
若自動彼將謂我無人既而果無事貞元時歷利涉軍

節度使世宗即位義即日來京以為叅知政事帝謂義
曰正隆率諸道兵伐宋若反旆北指計將安出義曰正
隆多行無道殺其嫡母阻兵虐衆必將自斃陛下太祖
之孫即位此其時也正隆已渡淮幹罕未熾將士在南
家屬皆在此惟早幸中都為便帝納之次榛子嶺世宗
聞海陵死于軍中謂義曰信如卿所料大定二年罷為
益都尹兼本路兵馬都總管子和尚大定初除應奉翰
林文字佩金牌持詔書宣諭中都以南州郡和尚為奉

使擅廢置州縣官輒行殺戮詔尚書省鞠治之十九年
詔以義孫引壽為賓喇哈達世襲穆昆義性辯給善談
論服玩不尚奢侈食不兼味云

烏雅富埒赫率賓路卓多明安人改屬海蘭路祖色埒
預平烏春烏木罕之亂及伐遼宋皆有功追授明安贈
銀青光祿大夫父古頁襲明安富埒赫從太祖伐遼勇
聞軍中天眷三年襲明安授寧遠大將軍累官武寧軍
節度使遷京兆尹海陵伐宋行武威軍都總管軍還為

順義軍節度使圖克坦喀齊喀定秦隴富埒赫統完顏
實訥埒延札們都兵救德順州改延安平涼尹致仕封
任國公大定十九年卒

烏雅普霞努率賓路錫馨河人也後改隸海蘭路父呼
實罕天輔初追授明安親管穆昆普霞努身長有力多
智畧襲其父明安穆昆階寧遠大將軍天德二年授陳
州防禦使貞元元年改昌武軍節度使以善綏撫再任
海陵南征改歸德尹為神策軍都總管當屯濟州比至

盜已據其城普霞努領十餘騎往覘之為賊衆所圍乃
與軍士皆下馬射殺百餘人賊衆敗走迺灑襲之至暮
而還明日攻破其城令士卒毋害居民郡中護安民感
之立祠以祭大定二年為慶陽尹元帥左都監圖克坦
喀齊喀奏宋軍十萬餘據險阻請益師詔益兵七千與
舊兵合為二萬遣普霞努與延安尹高景山等分領其
軍以往卒于軍子札拉

札拉力兼數人勇果無敵手持兩鐵簡重數十斤正隆

伐宋諸明安穆昆兵皆行州縣無備契丹瓜里陷韓州
圍信州遠近震駭札拉道出咸平遂率本部亟還信州
與戰敗之已而賊復整兵環攻勢且登城札拉下巨木
壓之殺賊甚衆瓜里解去札拉追及于韓州東八里許
賊方就平野為陣札拉身率銳士賊不能成列乃易馬
督軍復擊之賊衆大敗遂走東京咸平隆州民復帖然
世宗即位札拉謁見充護衛為驍騎副都指揮使領萬
戶擊斡罕戰于花道大軍未集札拉領左翼六百騎與

戰殺賊三千餘人富察世傑戰不利走札拉軍賊合圍
攻之札拉拒戰宗亨軍來援賊乃引去西過諾爾嶺追
及於陷泉賊先犯右翼札拉迎擊之賊退走偽護衛阿
卜薩身長有力奮大刀自後斫札拉拉回擊之折其
右臂與赫舍哩志寧軍合擊賊遂大敗斡罕平以為宿
直將軍父憂起復襲其父明安除蔡州防禦使改宿州
遷昌武軍節度使徙鎮邠州為賀宗歲元使射淮上柳
樹矢入其樹飲羽宗人異之改鳳翔尹入為右副點檢

復出尹興中改博索路總管高麗憚其威名凡以事至者望而跪之大定二十五年為興平軍節度使卒於官札拉貞慤寡言平居極和易及臨戰奮勇見者無不辟易雖重圍萬衆出入若無人之境云

李師雄字伯威鴈門人有材力喜談兵宋宣和中以騎射登科累官大名清平尉王師至大名師雄與府僚出降攝本路兵馬都監齊國建以為大總管府先鋒都統制知溫州齊廢為汴京馬軍都虞候歷和寧海軍曹州

刺史皇統二年為武勝軍節度使正隆末為河州防禦
使宋將吳璘軍攻秦隴會師雄以事就逮臨洮宋兵至
城下州人乘城拒守謀欲出降師雄止之宋將權儀鞭
馬方上浮橋師雄射之墜橋下遂擒權儀宋師退後從
元帥左監軍圖克坦喀齊喀攻河州有功未幾以疾歸
汴卒

尼瑪哈楚呼哈斯罕人初為大臬章京補元帥府通事
宋將韓世忠率軍數萬圍邠州楚呼將輕騎數百與偵

人數輩問道往救連敗敵兵宋人攻濟州奪戰艦畧盡時楚呼往宿州分富勒呼軍還至大河與敵遇力戰敗之盡復戰艦王師復河南宋別將田胡陵夜襲貝勒布呼營士卒盡沒楚呼從東平總管併力戰却之楚呼勇敢善伺敵虛實以此屢捷帥府承制加忠顯校尉為蕃部圖哩將之官河間尹大晃白于元帥請留楚呼以絡邊事許之錄功授慶陽少尹前後賜銀幣甚厚海陵將伐宋而契丹反樞密使布薩呼圖留守蕭懷忠等皆以

無功誅乃命楚呼與都統白彥敬副統赫舍哩志寧進
討會世宗即位于遼陽楚呼迎謁遷輔國上將軍與都
統烏哲庫副統渾討幹罕楚呼行至幹里與幹罕遇左
軍小却楚呼挺槍馳入其陣手殺二十餘人賊乃退元
帥布薩忠義自花道往追楚呼以前鋒追及于陷泉遂
大敗之事平遷西北路招討使改東北路楚呼與完顏
思敬有隙思敬為東京留守奉詔至招討使楚呼不出
餞帝聞之遣使切責既而思敬為平章政事北路招討

使楚呼以私取諸部進馬事覺被逮楚呼為人尚氣次
海濱縣慨然曰吾豈能為思敬辱哉遂縊而死大定十
九年詔以楚呼舊功授其子和尚襲布呼明安徒圖罕
穆昆

瓜爾佳札拉狀貌魁偉善女真契丹書天德初以功臣
子充護衛歷知平定軍事海陵南伐為武威軍副總管
大定二年授景州刺史遷同知京兆尹時宗室璋等與
宗將吳璘相拒於德順州元帥左都監圖克坦喀齊喀

遣札拉與諸將議破敵策璋等議曰我兵屢勝而敵不退者知我軍少故也須都監親至方可破敵於是喀齊喀領兵四萬至遂下德順州入為殿前右衛將軍襲父明安改左衛將軍遷右副點檢有疾丞相良弼目為國器親往視之九年出為東北路招討使兼德昌軍節度使到官治有勤績其斷獄公平道不拾遺遷臨潢尹兼本路兵馬都總管蕃部畏服邊境以安改西北路招討使十二年卒札拉性忠實內明敏每論大事超越倫輩大

師勗嘗以方之古人云

圖克坦喀齊喀上京速蘇海水人父佛寧世襲明安喀齊喀魁偉膂力過人一經聞見終身不忘天輔間從金源郡王羅索為章京天會六年以功為穆昆尋領羅索親管明安帥府聞其才命權左翼軍事皇統二年為隴州防禦使連敗宗兵於高陵秦州鳳翔皆以少擊衆領二穆昆拒饒風關宗兵二千來奪關口奮擊敗之諸軍乃得過險累遷平涼臨洮延安尹時關陝以西初去兵

革民多失業喀齊喀守之以靜還歸者甚衆正隆六年
為西蜀道兵馬都統大定二年為元帥右都監表陳伐
宋方畧詔許便宜從事轉左都監破宋兵于華州時宋
吳璘兵十餘萬侵古鎮分據大散關和尚原神義口王
女潭大蟲巖石壁寨寶雞縣陷河州鎮戎軍喀齊喀乞
濟師詔以河南兵萬人益之乃遣丹州刺史持嘉烏蘇
琦克以兵四千守德順吳璘悉兵圍之統軍都監舒穆
魯迪里將萬人破宋兵于河州還過德順駐平涼求益

兵于喀齊喀以解德順之圍喀齊喀遣萬戶完顏實訥
將大良順寧州刺史延扎們都各將本部兵合二萬人
以順義軍節度使烏雅富琦赫統押之與迪里會吳璘
使偏將將兵五千人來迎前鋒都兩蘇烏貢奚王和尚
擊敗之追至德順城南小溪邊璘自將大軍蔽岡阜而
出烏貢等馳擊之迪里富琦赫繼至併力戰日暮乃解
已而璘報云宋主遣使至兩國講和請各罷兵璘遂遁
去

按宋史紀事本末德順之戰璘自將督師無不以一
當百至暮搏戰益力敵大敗黎明師再出會大風雪

金人拔營去
與本傳互異
富埒赫亦引軍還頃之吳璘復犯陝西州

郡詔以兵七千益喀齊喀慶陽尹烏雅普霞努延安尹
高景山分領之彰化軍節度使璋通遠軍節度使烏雅
沃里布寧州刺史伊喇高善努京兆少尹宗室聶赫恩
州刺史完顏摩囉歡皆備軍前任使宋人驅率商號及
華山南山之民五萬人來圍華州押軍萬戶費摩蘇拉
欲堅壁守之明安但喇薩爾拉曰宋兵雖多半是居民
不習戰不如擊之於是蘇拉以千騎敗宋前鋒追及其

大軍亦敗之已而璋敗宋姚良輔軍于原州宋成軍自
寶雞以西至于大蟲嶺皆自散關遯去頃之吳璘聞持
嘉烏蘇埒克烏雅富埒赫軍已去德順率兵復據德順
陷鞏州臨洮府臨洮少尹赫舍哩薩哈死之喀齊以璋
權都統實訥埒權副統將兵二萬攻之連戰宋兵雖敗
璘恃其衆不肯去分其兵之半守秦州喀齊喀乃自行
駐水洛城東自六盤山西抵石山頭分兵守之當德順
秦州之間斷其餉道璘乃引去都統璋副統實訥埒邀

擊宋經畧使荆皋殺數千人擒宋將朱永以下將校十
二人宋張安撫守德順棄城遯遂復德順州宋之守秦
州者亦自退高景山定商號宗室聶赫取環州於是盡
復臨洮鞏秦河隴蘭會原洮積石鎮戎德順商號環華
等州府陝西平詔書獎諭賜以玉帶將士各以階級遷
資受賞戰沒者贈官賜錢有差五年置陝西路統軍使
兼京兆尹元帥府移治河中府統軍使璋朝辭帝曰鎮
防利害可訪問喀齊喀七年入為樞密副使改東京留

守賜衣帶佩刀九年入為平章政事奏睿宗收復陝西
功數事帝嘉納之藏之秘府封定國公十年薨帝方擊
毬聞訃遂罷有司致祭備禮以葬二十一年帝念其功
遷其孫薩哈武功將軍授世襲本明安海蘭烏克紳穆
昆泰和元年配享世宗廟庑

欽定續通志卷四百二十九

欽定四庫全書

欽定續通志卷四百三十

列傳

金八

赫舍哩良弼

石琚

唐古安禮

伊喇道光祖

蘇保衡

翟永固

魏子平

孟浩

梁肅

伊喇慥

伊喇子敬

赫舍哩良弼本名羅素輝發川人曾祖呼蘭祖特伯烈
父太宇世襲佛寧從宣寧天會中良弼方童壯選入西
京為女真字學生謁見丞相希尹於傳舍希尹稱為令
器年十四為北京教授學徒常二百人後多成名年十
七補尚書省令史簿書過目輒得其隱奧雖大文牒口
占立成詞理皆到除吏部主事天德初累官右司郎中
借祕書少監為宋主歲元使時納哈塔椿年為參知政
事薦良弼才出已右用是為刑部尚書

按納哈塔椿年
傳椿年薦良弼

海陵用為右司員外郎與本傳異

賜今名父憂起復改侍衛親軍馬步

軍都指揮使尋拜參知政事進尚書右丞轉左丞海陵
伐宋良弼諫不聽以為右領軍大都督海陵在淮南詔
良弼與監軍圖克坦貞撫定上京遼右世宗即位良弼
乃還汴京海陵死世宗就以良弼為南京留守兼開封
尹再兼河南都統召拜尚書右丞幹罕敗於陷泉入奚
中詔良弼佩金牌及銀牌四往北京招撫奚契丹還拜
尚書左丞上言祖宗以來未錄功賞者臣考按得三十

二人宜差第封賞詔五品以上官聞奏六品以下及無
官者尚書省約量遷除自是功勞畢賞進拜平章政事
封宗國公初山東兩路明安穆昆與百姓雜居詔良弼
度宜易置使與百姓異聚與民田互相犬牙者皆以官
田對易之自是無復爭訴大定六年進拜右丞相監修
國史左丞完顏守道奏近都兩明安父子兄弟往往析
居其所得之地不能贍日益困乏帝以問宰臣良弼對
曰必欲父兄聚居宜以所分之地與土民相換易雖暫

擾然經久甚便右丞石琚曰百姓各安其業不若依舊
便帝竟從良弼議太宗實錄成賜良弼金帶重綵良弼
請於權場市馬毋拘牝牡以備邊警帝從之八年同知
清州防禦事常德暉上書言吏部格法止叙年勞雖有
材能拘滯下位刺史縣令多不得人乞擇能吏任親民
之職帝是其言因語良弼等注意選擇進拜左丞相監
修國史如故良弼為相既久練達朝政帝所詢訪盡誠
開奏垂紳正笏不動聲氣議政多稱帝意是時夏國王

李仁孝乞分國之半以封其臣任得敬帝曰此非仁孝
本心不可從良弼議與帝意合既而夏國果誅任得敬
參知政事宗叙請置沿邊濠塹良弼曰敵國果來伐此
豈可禦哉帝曰卿言是也高麗國王王暉表讓國於其
弟皓帝疑之以問良弼良弼策讓國非實其後趙位寵
求內附表言皓實篡兄如良弼策進睿宗實錄賜重綵
通犀帶是年有事南郊良弼為大禮使自收國以來未
嘗講行是禮歷代典故又多不同良弼討論損益各得

其宜帝與良弼守道論明安穆昆官多年幼不習教訓
可依漢制置鄉老選廉潔正直可為師範者使教導之
良弼奏曰聖慮及此億兆之福也十四年宋主遣工部
尚書張子顏知閣門事

交聘表作明州觀察使

劉寔來請免親接

國書帝與諸臣議良弼奏曰宋國免稱臣為姪免奉表
為書恩賜已多今又乞免親接國書是無厭也必不可
從平章政事完顏守道參知政事伊喇道與良弼議合
左丞石琚右丞唐古安禮以為不從所請必至用兵帝

謂琚等所言非理遂從良弼議帝問宰臣求內外官舉
賢能良弼請申明前詔朝官六品以上外官五品以上
各舉所知從之帝欲徙幹罕逆黨分散置之遼東良弼
奏此輩已經赦宥徙之生怨望帝曰此目前利害朕為
子孫後世慮耳良弼曰非臣等所及也於是以前嘗預亂
者徙居烏庫哩實壘部帝問宰臣曰堯有九年之水湯
有七年之旱而民不病饑今一二歲不登而人民乏食
何也良弼對曰古者地廣人淳崇尚節儉而又惟農是

務故蓄積多而無饑饉之患今地狹民衆又多棄本逐末耕之者少食之者衆故一遇凶歲而民已病矣帝深然之於是命有司懲戒荒縱不務生業者十七年以疾辭相位不許十八年表乞致仕歸田里帝遣使慰諭授和倫松科明安使其子攝事給良弼丞相俸兼致仕歸其後尚書省奏差除帝曰丞相良弼擬注差除未嘗苟與而薦舉往往得人鈕祜祿額特埒伊喇噠費摩餘慶皆其所舉至於私門請託絕然無之嘗問良弼每旦暮

日色皆赤何也良弼曰旦而色赤色應在東高麗當之
暮而色赤應在西夏國當之願陛下修德以應天則災
變自弭矣既而夏國有任德敬之亂高麗有趙位寵之
難其言皆驗云是歲薨帝悼惜之遣使敕葬祭奠追封
金源郡王命翰林待制伊喇履勒銘墓碑謚誠敏良弼
性聰敏忠正善斷決言論器識出人意表起寒素致位
宰相盡心國事薦舉人材常若不及居家清儉親舊貧
乏者周給之與人交久而愈敬居位幾二十年贊成太

平號賢相焉大定十五年圖像衍宮加謚武定明昌五年配饗世宗廟庭

石琚字子美定州人沈厚好學父臯補郡吏廉潔自持稱為長者從魯王棟摩攻青州州人堅守不降棟摩怒及城破命臯計州民人數將使諸軍分掠之臯緩其事棟摩讓之臯曰大王為朝廷撫定郡縣當使百姓安堵無或侵苦之若取城邑而殘其民則未下者必死守以拒我棟摩感悟乃下令曰敢有犯州人者以軍法論臯

隨守定州唐縣人王八謀為亂書其縣人姓名於籍無慮數千人其黨持籍詣州發之臯主鞠治時冬月臯抱籍上聽事佯為頓仆覆其籍爐火中盡焚之不可復得其姓名止坐為首者餘皆得釋琚生七歲讀書過目成誦既長博通經史工詞章天眷二年中進士第一調邢臺縣令刑守貪暴屬縣掎取民財以奉所欲琚獨無所與既而守以贓敗他令佐皆坐累琚以廉辦改秀容令復擢行臺禮部主事召為左司都事累遷吏部郎中貞

元三年以父喪去官尋起復為本部侍郎大定二年擢為諫議大夫侍郎如故奉命詳定制虔琚上疏六事大槩言正紀綱明賞罰近忠直遠邪佞省不急之務罷無名之役帝嘉納之遷吏部尚書琚自員外郎至尚書皆在吏部典選且十年凡宋齊換授官格南北通注銓法能縷指而次第之尋拜參知政事與右丞蘇保衡共監護十六位工役許從宜規畫帝謂琚曰此役不欲煩民丁匠皆給雇直毋使貪吏緣為姦利卿等勉稱朕意圖

克坦喀齊喀定陝西琚請曲赦秦隴以安百姓帝從之
毋憂起復拜尚書右丞天長觀災詔有司營繕有司闢
民居以廣大之費錢三十萬貫蔚州采地葦役數百千
人琚奏之帝曰自今凡稱御前者皆稟奏琚與孟浩對
曰聖訓及此百姓之福也時議禁網捕狐兔等物累計
其獲或至徒罪琚奏曰捕禽獸而罪至徒恐非陛下意
杖而釋之可也帝曰然久之進左丞兼太子少師世宗
將行郊祀議配享琚曰周郊祀以后稷配天漢魏晉皆

以一帝配之唐宋之初皆以三帝配終竟依古配以一
祖將來親郊合依古禮帝曰唐宋變古不足為法止當
奉太祖皇帝配之琚嘗請命太子習政事或譖琚希恩
東宮世宗察其無他以此言告之琚因乞解少師十年
二月祭社有司奏請御署祝版帝問琚曰當署乎琚曰
故事有之帝曰祭祀典禮卿等慎之無遺譏後世帝謂
琚曰女真人往往徑居要遠不知閭閻疾苦卿當為丞
簿知民間事凡利害極陳之帝與宰臣議鑄錢因問琚

曰古亦有百姓鑄錢者乎對曰使百姓自鑄則小人圖厚利錢愈薄惡古所以禁也時民間往往造作妖言相為黨與謀不軌帝問宰臣曰南方尚多反側何也琚對曰南方無賴之徒假託釋道以妖幻惑人愚民無知遂至犯法帝曰如僧智究是也此輩不足卹但軍士討捕利取民財害及良民不若杜之以漸也智究大名府僧假託抄化誘惑愚民潛結姦黨謀取東平諸州府事覺伏誅宗室子或不勝任官事世宗欲授散官量與廩祿

以問宰相琚對曰堯親九族周家內睦九族皆帝王盛
事也琚之將順多此類參知政事唐古安禮忤帝意出
鎮橫海軍數年不召琚從容進曰安禮忠直久在外官
世宗深然之遂自南京留守召為尚書右丞又嘗舉室
紹先為右司員外郎十七年拜平章政事封莘國公明
年拜右丞相修起居注伊喇傑上書言朝奏屏人議事
史官亦不與聞無由紀錄帝以問宰相琚與唐古安禮
對曰古者史官天子言動必書以儆戒人君庶幾有畏

不可避也帝曰朕觀政要唐太宗與臣下議論始議如何後竟如何此政史官在側記而書之耳若恐漏泄幾事則擇慎密者任之朝奏屏人議事記注官不避自此始數以老病乞致仕許之詔以一孫為閣門祇候既歸鄉里帝每稱石琚舉能其官最為知人二十二年以疾卒於家謚文憲泰和元年圖像衍慶宮配享世宗廟庭

初世宗將立元妃為后以問琚琚對曰元妃之立本無異辭如東宮何世宗悟而止金世內燕惟親王公主駙

馬得預一日時召琚入謂諸王以下曰使我家人有今日之樂者此人力也二事見原史贊中附識於此

唐古安禮本名烏楞古字子敬好學通經史工詞章知
為政大體貞元中累官臨海軍節度使翰林侍讀學士
及彰化軍節度使大定初遷益都尹召為大興尹帝曰
京師好訛言府中姦吏為民患卿雖年少有治才去其
宿弊毋為因仍察廉入第一等進階榮祿大夫七年五
月大興府獄空詔錫宴勞之久之拜參知政事按世宗
紀大定
四年以大興尹唐古安禮參知
政事本傳次之七年之後恐誤罷為橫海軍節度使歷
南京留守以喪去官起復尚書右丞轉左丞他日帝曰

薦舉大臣之職外官五品猶得舉人宰相無所舉何也
安禮對曰孔子稱才難賢人君子世不多有陛下必欲
得人當廣取士之路區別器使之斯得人矣帝曰除授
格法不倫天下一家獨女真有超遷格何也安禮對曰
祖宗以來立此格恐難輒改進拜平章政事封芮國公
授世襲穆昆安禮嘗議科目言於帝曰臣觀近日士人
不以策論為意今若詩賦策論各場考試文理俱優者
為中選以時務策觀其器識庶得人也帝曰卿等議之

二十一年拜右丞相進封申國公固辭帝曰朕知卿正直且練習政事其母多讓安禮頓首謝是歲薨泰和元年配享世宗廟庭

伊喇道本名照蘇其先伊實部人徙咸平為人寬厚有大志以篤孝著名通女真契丹漢字皇統初補刑部令史再遷大理司直母憂起復遷戶部員外郎正隆三年徙臨潢咸平路畢沙河等三明安屯戍噶爾薩還遷本部郎中海陵伐宋為都督府長史海陵死師還無復紀

律百姓苦俘掠有男女二百餘人自願與道為奴道受之至淮俟諸軍畢濟乃悉遣還大定二年復為戶部郎中與梁球安撫山東招諭盜賊民或避盜避役者並令歸業布薩忠義討幹罕道參謀幕府事賊平元帥府以俘獲生口分給官僚道悉縱遣之遷翰林直學士兼修起居注世宗曰道清廉有幹局翰林文雅之職不足以盡其才乃改同知中都路都轉運事詔送河北山東等路廉察善惡升降官員制敕遷大理寺卿五年宋人請

和罷兵道往山東閱實軍器振贍戍兵妻子再除同知
大興尹親軍百人長完顏額森博勒非禁直日帶刀入
宮其夜入左藏庫殺都監郭良臣盜取金珠點檢司執
其疑似者八人掠笞三人死五人者自誣帝命道參問
道緩其獄既而額森博勒衛金事覺伏誅詔賜掠死者
錢人二百貫周其家不死者人五十貫遷戶部尚書改
西北路招討使賜金帶故事招討使到官諸部皆獻馳
馬多至數百道皆却之父喪去官起復參知政事初諸

部有獄訟招討司例遣胥吏按問往往為姦利道請專設一官帝嘉納之招討司設勘事官自此始帝謂宰臣曰比聞大理寺斷獄輒經旬月何邪道奏曰在法決死囚不過七日徒刑五日杖刑三日帝曰法有程限而輒違之此官吏之責也嚴戒約以去其弊進尚書右丞乞致仕不許除南京留守賜通犀帶入拜平章政事道弟臨潼令約博犯罪至死道待罪於家詔起視事是時縣令多闕帝以問宰相道奏曰散官宣武以上借除以充

之帝曰廉察八品以下已去官者錄事丞簿有清幹之譽者縣尉入優等者散官至五品無貪汙曠職之名者皆與縣令俟縣令不闕即如舊制二十三年罷為咸平尹封莘國公致仕歸咸平二十四年薨賻贈有加詔圖像藏秘省擢其子光祖為閣門祗候

光祖字仲禮幼名巴噶以廕補閣門祗候累官至秘書監右宣徽使興定二年十一月詔集百官議所以為長久之利者光祖等三人議曰募土人假以方面權任俾

人自勸各保一方由是公府封建之論興焉語在九公傳三年轉左宣徽使五年卒

蘇保衡字宗尹雲中天成人父京遼進士為西京留守宗翰兵至西京京出降久之京病篤以保衡屬宗翰京死宗翰薦之朝賜進士出身補太子洗馬調解州軍事判官左監軍薩里罕駐軍陝西辟幕府參議軍事累官同知興中尹天德間繕治中都張浩舉保衡分督工役改大興少尹督諸陵工役遷工部尚書海陵治兵伐宋

與徐文等造舟於通州兵興保衡為浙東道水軍都統制率舟師泛海徑趨臨安為宋兵所敗副統制鄭家死之大定二年召赴中都時山東盜賊嘯聚百姓困弊詔保衡安撫山東發倉粟以賑之還除刑部尚書與工部尚書宗永兵部侍郎完顏額哩頁往河南山東陝西宣問屯田軍人有曾破大敵及攻城野戰立功者具姓名以聞布薩忠義伐宋保衡行戶部於關中魚糾察許以便宜黜守令不法者十餘人卻守傳慎微忤用事者被

讒構下獄保衡力救得免入為太常卿遷刑部尚書

按世

宗純保衡以大定三年六月由刑部尚書參知政事本傳作禮部謹改正

拜參知政事三年

宋人請和詔保衡往南京與布薩忠義斟酌事宜行之入奏進右丞六年冬有疾求致仕不許未幾卒

翟永固字仲堅中都良鄉人太祖以燕歸宋宋人以經義兼策取士永固中第一授開德府儀曹叅軍金破宋永固北歸中天會六年詞賦科歷樞密院令史辟左副元帥宗翰府掾永固家貧求外補宗翰愛其能不許以

錢三千貫周之薦於朝攝左司郎中累遷工部員外郎
母憂去官起復禮部郎中遷翰林直學士海陵篡立以
侍衛親軍都指揮使完顏思恭為報諭宋使永固為副
使還改禮部侍郎久之分護燕京宮室役事永固請寫
無逸圖於殿壁不納俄遷太常卿考試貞元元年進士
出尊祖配天賦題忤海陵意杖之頃之升禮部尚書正
隆二年轉翰林學士承旨召至內殿問以將親伐宋事
對曰宋人事本朝無釁隙伐之無名縱使可伐亦無煩

親征遣將帥可也由是大忤海陵意因請致仕歸卧於家大定二年起拜尚書左丞請依舊制廉察官吏革正隆守令之汙從之明年出為真定尹五年懇乞致仕許之六年卒

魏子平字仲均弘州人登進士第調五臺主簿累除太府監正隆三年為賀宋主生日副使使還入見海陵方謀伐宋問江左事且曰蘇州與大名孰優子平對曰江湖地卑濕夏服蕉葛猶不堪暑安得與大名比海陵不

悅世宗即位除戶部侍郎大定二年丞相布薩忠義伐
宋置元帥府於南京子平掌餽運給金牌一銀牌六糧
道給辦進戶部尚書六年復為賀宋主生日使久之拜
參知政事帝問子平曰戊卒逋亡物故今按物力高者
補之可乎對曰富家子弟驍懦不可用以守戍請按物
力多寡賦之募材勇騎射之士不足則調兵家子弟補
之庶幾官收實用帝從之他日帝問曰前日令內任官
六品以上外任五品以上並舉所知未聞有舉之者豈

其無才蓋知而不舉也子平曰請令當舉之官每任須舉一人澤州刺史劉德裕祁州刺史色格滄州同知額哩頁易州同知額哩埒楚丘縣令劉春格以贓汙抵罪帝欲詔示中外丞相守道以為不可子平曰臣聞懲一戒百陛下固宜行之遂降詔焉宋人於襄陽漢江上造舟為浮梁三南京統軍司聞而奏之帝問宰臣子平曰臣聞襄陽薪芻皆於江北取之殆為此也既而河南統軍使宗叙求入見奏邊事帝使修起居注鈕祜祿額特

埒就問額特埒召詰言邊事者皆無實狀行至境上問
襄陽浮橋乃樵采之路如子平策還奏詔凡妄說邊關
兵事者徒二年帝問宰臣曰祭宗廟用牛牛盡力稼穡
有功於人殺之何如子平對曰惟天地宗廟用之所以
異大祀之禮也十一年罷為南京留守未幾致仕十五
年起為平陽尹復致仕二十六年卒於家

孟浩字浩然灤州人遼末年登進士第天會三年為樞
密院令史除平州觀察判官天眷初選入元帥府備任

使承制除歸德少尹充行臺吏禮部郎中入為戶部員外郎韓企先為相拔擢一時賢能皆置機要浩與田穀皆在尚書省穀為吏部侍郎浩為左司員外郎既典選善銓量人物分別賢否所引用皆君子而蔡松年曹望之許霖求與穀相結穀薄其為人拒之松年初在行臺省巧得宗弼意宗弼當國引為刑部員外郎望之為尚書省都事霖為省令史皆怨穀等短之於宗弼企先薨穀出為橫海軍節度使選人龔夷鑒除名值赦赴吏部

銓得預覃恩穀已除橫海部吏以夷鑒白穀穀乃倒用
月日署之許霖在省典覃恩而行臺省工部員外郎張
子周亦與穀有怨以事至京師嗾許霖發之詆以專擅
朝政詔鞠治穀與夷鑒等皆擬死其妻子及所往來孟
浩等三十四人皆徙海上遇天德赦令還鄉里多物故
惟浩與穀兄穀王補馮煦王中安在世宗知田穀黨事
皆松年等構成大定二年召浩為侍御史穀為大理丞
補為工部員外郎煦為兵部主事知火山軍事而

浩尋復為右司員外郎浩篤實遇事輒言無所隱帝嘉其忠每對大臣稱之有疾求外補除祁州刺史致仕歸七年起為御史中丞浩已年老世宗不次用之再閱月拜參知政事中丞拜執政者自浩始世宗敕有司於東宮涼樓前增建殿位浩諫曰皇太子義魚臣子若所居與至尊宮室相侔恐制度未宜固宜示以儉德帝曰善遂罷其役帝宴羣臣於東宮謂羣臣曰叅政孟浩公正敢言自中丞為執政卿等能如是朕亦不次用之初海

陵以近習掌記注記注不明帝謂當時行事實錄不載
衆人共知之者宜訪書之浩對曰良史直筆君舉必書
帝王不自觀史記注之臣乃得盡其直筆又奏曰歷古
以來不明賞罰而能治者未之聞也國家賞善罰惡蓋
亦多矣而天下莫能知乞自今凡賞功罰罪皆具事狀
頒告之使君子知勸以遷善小人知懼以自警從之進
尚書右丞兼太子少傅罷為真定尹十三年薨田穀自
大理丞累官同知中京留守終于利涉軍節度使二十

九年章宗詔尚書省曰故吏部侍郎田穀等皆中正之士小人以朋黨陷之由是得罪世宗用孟浩為右丞當時在者俱已用之亡者未加追復其議以聞張汝霖持不可汝霖死後章宗復詔尚書省追復田穀等官爵其子孫並加恩卹

梁肅字孟容奉聖州人自幼勤學天眷二年擢進士第調平遙縣主簿遷望都絳縣令以廉入為尚書省令史除定海軍節度副使遷山東西路轉運副使營治汴宮

肅分設役事攝大名少尹正隆末境內盜起平人陷賊
中不能自辨者數千人皆繫大名獄肅到官考驗得其
情讞出者十八九大定二年趙植上書言梁肅勤恪清
廉願加進擢於是遷中都轉運副使改大興少尹肅上
疏言方今用度不足非但邊兵耗費而已吏部以常調
除漕司僚佐皆年老資高者為之類不稱職臣謂凡軍
功進士諸科門蔭人知錢穀利害能使國用饒足而不
傷民者許上書自言就擇其可用授以職事每五年委

吏部通校有無水旱屯兵視其增耗而黜陟之民間粟
麥歲為酒所耗者十常二三宜禁天下酒麴不報三年
坐捕蝗不如期貶川州刺史削官一階解職尋除河北
東路轉運副使是時幹罕亂後兵食不足詔肅措置沿
邊兵食移牒肇州北京廣寧鹽場許民以米易鹽兵民
皆得其利四年通檢東平大名兩路戶籍物力稱平允
他使者所至皆以苛刻增益為功百姓苦之朝廷敕諸
路以東平大名通檢為準七年父憂去官起復都水監

河決李固詔肅視之

按河渠志大定八年河決李固九年遣肅往視之本傳統係之七年

者省文也

還奏決河水六分舊河水四分今障塞決河復故

道為一再決而南則南京憂再決而北則山東河北皆
可憂不若止於李固南築隄使兩河分流以殺水勢帝
從之改大理卿時東京久不治帝自擇肅為同知東京
留守事遷中都都轉運使轉吏部尚書上疏論臺官自
大夫至監察諫官自大夫至拾遺陛下宜親擇不可委
之宰相恐樹私恩塞言路也帝嘉納之肅舉同安主簿

高旭除平陽酒使肅奏曰明君用人必器使之旭儒士
優於治民若使坐列肆榷酒酤非所能也臣愚以為諸
道鹽鐵使依舊文武參注其酒稅使副以右選三差俱
最者為之帝曰善改刑部尚書宋主屢請免立受國書
之儀世宗不從及大興尹璋為十四年正旦使宋人就
館奪其書而重賂之璋還杖一百五十除名以肅為宋
國詳問使肅至宋宋主一一如約立接國書還至泗州
先遣都管趙王府長史圖們富尼瑪入奏世宗大喜欲

以肅為執政左丞相良弼曰梁肅可相但使宋還即為之宋人自此輕我矣帝乃止久之為濟南尹上疏曰刑罰世輕世重今取遼季之法徒一年者杖一百是一罪二刑也刑罰之重於斯為甚今太平日久有司猶用重典臣實痛之乞自今徒罪之人止令居作更不決杖不報未幾致仕起復彰德軍節度使召拜叅知政事肅奏漢之羽林皆通孝經今之親軍即漢之羽林也臣乞每百戶賜孝經一部使之教讀庶知臣子之道帝曰善詔

與護衛俱賜焉肅上疏論生財舒用八事一曰罷隨司
通事二曰罷酒稅司句欄人三曰天水郡王遠族可罷
養濟四曰裁減隨司契丹吏員五曰罷權醋以利與民
六曰量減鹽價使私鹽不行民不犯法七曰隨路酒稅
許折納諸物八曰今歲大稔乞廣糴粟麥使錢貨流出
帝曰趙氏養濟一事乃國家美政不可罷其七事宰相
詳議以聞肅又論正員官被差權攝官有公罪及正員
還任皆准去官勿論往往其人苟且不事其事乞於縣

令中留十人備差無差正員官帝曰自今權攝有公罪
正員雖還而本職未替者勿以去官論之肅與宰相奏
事既罷復跪而言曰四時畋獵雖古禮聖人亦以為戒
陛下春秋高屬時嚴寒法宮燕處亦足怡神願為宗社
自重帝曰朕諸子方壯使之習武故時一往爾肅又論
盜賊不息請無禁兵器帝曰所在有兵器其利害如何
肅曰他路則已中都一路上農夫聽置之似乎無害帝
曰朕將思之凡使宋者宋人致禮物大使金二百兩銀

二千兩副使半之幣帛雜物稱是及推排物力肅自以昔嘗使宋所得禮物多而身為執政當為庶民率先乃自增物力六十餘貫論者多之二十三年肅請老從之詔以其子汝翼為閣門祗候二十八年薨謚正憲

伊喇慥本名伊德爾契丹伊囉勒部人通契丹漢字尚書省辟契丹令史攝知除擢右司都事正隆南伐兼領契丹漢字兩司都事大定二年除真定少尹入為侍御史母憂去官起復右司員外郎累官陳州防禦使左丞

相赫舍哩良弼致仕帝問誰可代卿者對曰伊喇慥清
幹忠正臣不及也遂召為太府監改刑部侍郎十九年
為大理卿被詔典領更定制條慥取皇統舊制及海陵
續降通類校定通其窒礙刪其繁碎有例該而條不載
者用例補之特闕者用律增之凡制律不該及疑不能
參決者取旨畫定凡特旨處分及權宜條例內有可常
行者收為永格其餘未可削去者別為一部凡一千一
百九十餘條為十二卷書奏詔頒行之攝御史大夫改

御史中丞同修國史歷刑吏二部尚書改大興尹復為
西京留守改臨洮尹卒

伊喇子敬同文本名鄂克多囉遼五院人曾祖巴格同
平章事父博囉准備任使官都統杲克中京遼主西走
留博囉督輜重已而被掠博囉自髡逃於山林子敬讀
書好學皇統間特進伊喇因修遼史辟為掾屬遼史成
除同知遼州事本廳舊占民田州官歲取課數百貫地
主以為例未嘗辯子敬悉却之秩滿郡人請留於行臺

省不許天德三年入為翰林修撰遷禮部郎中正隆元年諸將巡邊詔子敬監戰軍帥以戰獲分將士子敬獨不受及還海陵以子敬家貧不苟得甚嘉之凡同僚所取者皆沒入於官遷翰林待制大定二年同修國史時幹罕餘黨散居諸明安穆昆中詔子敬往撫之令勿相害使還改秘書少監兼修起居注修史如故常召入講論古今及時政利害或至夜半子敬有良馬平章政事完顏元宜索之子敬以其為相也不與至是元宜乞致

仕罷為東京子敬乃以此馬贖行識者題之遷右諫議大夫起居注如故帝幸西京州縣官入見明安穆昆不得隨班子敬奏軍民一體合令明安穆昆隨入見帝嘉納詔依子敬奏行之子敬言山後禁獵地太廣有妨百姓耕墾帝用其言遂以四外獵地與民遷秘書監諫議起居如故帝將如涼陞子敬與右補闕鈕祐祿額特埒左拾遺楊伯仁奏曰車駕至和爾和西北招討司圍於行宮之内地矣乞遷之於界上以屏蔽環衛帝曰善詔

尚書省曰招討錫里庫可徙界上治蕃部事都監薩巴
仍於燕子城治明安穆昆事轉簽書樞密院事同修國
史出為河中尹改興中尹子敬女自懿州來興中省謁
遇盜途中剽掠其行李且盡既而還之謝曰我輩初不
知為府尹家也尹有德於民尚忍侵犯邪徙咸平廣寧
尹二十一年致仕卒於家子敬嘗使宋及受諸部進貢
所受禮物皆散之親舊及卒家無餘財其子質宅以營
葬事

欽定續通志卷四百三十